

## *ASO LUA, 28 IUNI 2022*

*Na toe faaauau Taulumaga a le Fono Aoao Faitulafono i le itula e 6:00 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

E faataatiaese a tatou Taulumaga i le itula e 1:00 i le aoauli o lo o saunoa le Afioga i le Minisita mo le Soifua Maloloina.

Ou te tapa ma le faaaloalo lau Afioga e te tulai mai mo le faaauauina o lau saunoaga.

### **Afioga Hon VALASI LUAPITOFANUA TOOGAMAGA TAFITO**

**SELESELE:** Lau Afioga i le Fofoga Fetalai, o lea ua faatagimoe manu o le afiafi, ou te talitonu foi ua mavae lupe o pupula ua mavae lupe o mau, ua tatou fesilafai i lupe o taulaumea. E i ai le agaga o lenei afiafi lau Afioga, e le o toe tele foi se mataupu pei ona laga, ae le mafai le mafai ona alu ese ma le tali atu i sui usufono mamalu. A o le mea moni, e faamalulu i sui usufono mamalu, e leai o lea lava sa taumafai e agai atu ina ia faamanino tulaga uma.

A o le i avatua se faamatalaga tuusao i tulaga sa laga, e lagona le faafetai ma faamalo i le tatou Salelesi mo le taulaga faia pea i aso uma o le tatou Fono i le tautuaina. Malo faafetai. Ia faatupu tele e le Atua le malie o lou siufofoga, aemaise lou malosi aua le tautuaina o le Maota o Samoa.

Lau Afioga i le Fofoga Fetalai, ona ou oo mai lea i mataupu sa laga e Vaimauga 1. E tasi lea sui usufono e ese le taua o mea e lagalaga aemaise foi ana sailiiliga. Ou te le iloa po o ai na taua i le sui usufono ua amata ona pau le service a le falemai, ae malo faafetai, faafetai i le... O le faafesili i tulaga o le pau o le auaunaga i nisi o vaega, e moni ma faamaoni. O nisi o vaega ua leva ona i ai le tulaga lea, ou te taunuu mai foi au ua leva ona i ai. Masalo e le o manino le Maota i le taua o nei foi tulaga e pei ona i ai auaunaga a le Soifua Maloloina, lea e pei ona manino i tulaga o le faafesili a Vaimauga 1. Ou te tali atu e faapea, ua leva ona faatinoina ma ua pau le

vaaia o le falemai i so o se tagata gasegase mai le \$10 i le \$8. So, o lea lava e sosolo i le faapau ma faamanuiaga e pei ona i ai tulaga e pei ona i ai auaunaga.

O le isi mea ia aua ne i galo i le tatou Maota mamalu aemaise o le faafofoga a Samoa, o le vaaiga o le tamaitiiti se i tulou seia oo atu i le 15 tausaga, e vaai fua lava. E leai se totogi mo tamaiti amata mai pepe seia oo atu i tamaiti e 15 tausaga. Tasi lena mea ia matauina, e vaai fua.

O le isi tulaga, o tagata matutua penisione e 65 tausaga agai i luga, e faapena foi le aumatutua, e leai se totogi mo a latou tagata matutua amata i le 65 agai luga aemaise foi le aveina o latou fualaau. Tasi lea vaega taua.

O tagata e i ai mai tumau, mai suka ma toto maualuga, e ave fua foi a latou fualaau. O lea e faamauiina le mea e tau o le free drug supply, o i ina la e maua ai avanoa ia. O le mea ua leva ona fai, ma e taua ia o ia auaunaga, o le tagata e mai suka, mai toto maualuga se i tulou, ia o lea ua faafofoga le Maota, e faapena, e leai se totogi o ana fualaau, aemaise foi le vaaiga o latou.

O tina maitaga, e le o i ai foi ni totogi o lo o i ai mo tina maitaga e agai atu i le falemai. Tasi la ia vaega taua. A faafofoga la ma silasila ma matau, o le tele ia o vaega o lo o tuu i ai le faamuamua a le Matagaluega, aemaise foi le tulaga e pei ona i ai le vaaiga ma latou fualaau. Masalo e le na ma le laina tulaga faapenei e tatau ona faafetaia ai foi le Matagaluega, aua o lea lava e sai i le taugata, sai i le taugata, ae a manino lava vaega...

O le vaega e 16 tausaga agai i luga i le 64 tausaga, o le vaega malolosi la lea, ia o isi la vaega ia o lea e fai i ai le sailiiliga ma fuafuaga a le Matagaluega, ia po o le a foi se isi faamamaavega. Ae o tulaga na pei ona ou tali atu ai i le faafesili a le Vaimauga, e ese le taua, ma e talitonu foi ua manino lona finagalo, aemaise foi lana faafesili. Ia o lea la ua faafofoga mai le sui usufono mamalu, ua ave le lagalaga o lau faafesili ua e silafia ai, o lo o tele lava vaega po o latou e agai atu i le falemai e i ai le faamamaavega, aemaise foi tulaga e pei ona faafaigofie ai tulaga o latou fualaau, aemaise o le vaaiga e alii ma tamaitai fomai.

Ona ou oo mai lea i le mataupu sa laga ma le fesili e tasi a le Afioga ia Aiono le Laau na Fausia, le sui usufono o Aana Alofi 2 lea sa faafesili ai i tulaga e pei ona i ai gasegase foi ia e tuuina atu mo le taofia i totonu o falemai, sa fesili foi le tama i tulaga e pei ona i ai taumafa. E tasi lea manulauti a le faigamalo, ina ia taumafai ia maua taumafa a falemai i nuu i tua, gasegase. O lo o i ai foi le faataotoga ma le faataatiaga ia o lua le fausia ma le faaleleia o falemai ma fausia ai mea o umukuka, se i tulou, faapitua ina ia mafai ona faatino auaunaga nei i tulaga e pei ona i ai tatou gasegase. O le taimi nei ua na o Tuasivi ma Motootua o lo o faafoeina ai, a o le agaga lena mo le faataotoga i le agai i luma, ina ia mafai ona oo atu i tua tulaga faapenei, ae o lo o i ai lava faatalanoaga, aua o le tele o nisi falemai i nuu i tua, e i ai taimi e maua ai gasegase i totonu o falemai. E i ai isi taimi e asiasi atu pe na o se tasi lava se mai se i tulou, ia po o le leai foi. Ua vaaia lena

vaaiga i nuu i tua i nisi o falemai o tatou itumalo. Ia o le ala foi lea o le taumafai ina ia faatalanoa ma faataoto tulaga lelei aua lava tatou gasegase nei pei ona faafesiligia, ae o lo o i ai lava fuafuaga mamao aemaise le faataotoga o fuafuaga uma ina ia mafai ona oo atu i ai lea fesoasoani aemaise foi o lea auaunaga.

Lau Afioga ona oo mai lea i le talosaga a Satupaitea. Sa talosaga Satupaitea i se taavale, ae faamatala mai ai le isolate o lona faletua. E leai se aiga o le taavale ma le isolate ai o lona faletua. E foliga mai o nisi nei o mea o lo o matauina ma atagia i mea o Koviti-19 nei, e foi mai le fafine ua tau musu le tamaloa e mafuta ma le ava. Ae ou te talitonu o si ou uso, ia e leai. Faafetai o lea ua tau mai ia te au le faamaoni o le sui usufono Satupaitea i le tulaga o le tausiga o le tina aua ne i aafia i se mai, ina ia aua foi ne i aafia ia i se gasegase.

O le tali atu i le taavale lau Afioga ua uma ona tuuina atu le taavale ave mai aemaise foi o lo o i ai ma le pikiapu i Satupaitea aua le aufaigaluega. Sa i ai le isi taavale a ua faaleagaina, ia o lea ua toe faafoi atu le isi taavale e fesoasoani i le aufaigaluega. Ae mo le taimi nei, ia taoto mai, o lea ua i ai fuafuaga faataotooto i le vaavaai, aemaise foi le taua o le manatu ua ae ma vaavaai i le agai i luma, e tatau lava ona i ai ni taavale faapitoa e feoai ai tatou fomai, ia le gata foi i lea o le mamao o nisi itumalo, ae leai ni auala o fomai, ae le gata i lea o le aufaigaluega. Tasi ia vaega o lo o vaavaai i ai le tulaga o le tatou Malo aemaise Matagaluega, o le tasi foi lenei Matagaluega e tele lava fesoasoani mai fafo e ala i mea nei o auala. Ou te talitonu foi o ia mea uma, tatou faatuatua i le Atua, ia aua ne i o tatou popole. Lau Afioga i le sui usufono o Satupaitea, ia aua ne i e popole i ia tulaga, o tulaga lava e tatau ona silafia aemaise foi le tatou onosaia.

Lau Afioga i le sui usufono mo Gagaemauga 2, e pei ona taua le falemai i Avao, sa i ai le fomai sa tausavali mai Safotu i Avao, ae ina ua oo i le taimi ua lockdown ma tatou i ai i tulaga o puipuiga o vavao, o i ina sa amata ai ona taumafai le Matagaluega ina ia faaititia le tulaga o le faaaogaina, ma o lea ua amata le toe faatalanoaina ina ia mafai ona toe tausia lelei, aemaise tulaga e pei ona i ai le tatou falemai lea.

I le vaavaai i ai i le amataga lava o se tautalaga i le Tala o le Tupe i le uluai taimi na tulai mai, sa siaki atu e ese le manaia o le falemai lea, tasi lea nofoaga e pei e foliga e tasi lea nofoaga e tatau ona fausia lelei ma ia lelei atili aua tatou gasegase ave mamao ese atu i totonu mai aai, aemaise foi tulaga e pei ona i ai. O le tasi o mea sa faaalua e le sui usufono, e pei e fefefe tagata e agai i ai ona e faapea... ia e talitonu lava i le tiapolo le sui usufono, ae ou te talitonu ua uma na aso, a o le taua ia o le falemai lea, o le taua ia o le falemai lea.

**Tofa Seuamuli Fasi Toma:** Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita se i tuu atu le avanoa i le sui usufono mo Gagaemauga 2.

**Tofa Seuamuli Fasi Toma:** Faafetai mo le avanoa, o lea ua faafofoga le paia o le Maota aemaise foi o se faafofoga a Samoa i le saunoaga a le Afioga i le Minisita e uiga i le falemai lenei. E le i safea i se upu a lou sui usufono le tulaga lea e uiga i tevolo. Ua valaau le Atua i le sui usufono sa ia lafoa le upu lea i totonu o le Palemene lenei, a o le tulaga o le aso, ia, e leai, o le mamalu o le atunuu aemaise foi o alii ma tamaitai fomaini, o i latou ia e nonofo ma faatupu le tala lea e uiga i le nofoaga lea i Vaipouli, leaga o i sa pouliuligia ai le vai lea aua le faafeagai ai o le gagaeolemauga ma le gagaifo i lena foi vaitau.

Ma le faaaloalo, ae faamalulu atu i lau Afioga i le Fofoga Fetalai, e leai se lafoga a lou sui usufono e uiga i le vaega lea e uiga i le nofoaga lea i Vaipouli. Ma le faaaloalo.

**FOFOGA FETALAI:** Malo faafetai. Ia, saunoa lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Faafetai. Faafetai i le sui usufono mamalu. Ia faafoi mai se upu ia te au nei, aua o le agaga lava, pei e tasi lea mea sa momoli mai e nisi o le itumalo, faapea e fai si tiapoloa tele pe aitua o le mea. E ui o lea, o lea ua faamanino e le sui usufono o le Tiakono Toeaina, ia e le o se mea mamafa lea mea.

O le isi mea sa e taua lau Afioga, sa fai si ogaoga foi o lau tuuaiga i le tuai o le fale o le faamamatoto o lo o i ai nei po o le Kidney Foundation a tatou, e faapea ua malosia, ua tuai ma palapala, aemaise foi ua faaletonu. Aua ne i galo lau Afioga i le Fofoga Fetalai ma le mamalu o le Maota, o Oketopa i le tausaga lenei, o le a me i i ai le... a o le a me i le faamamatoto i lona nofoaga fou ua uma ona fausia i tulaga aloaia faaonaponei, aemaise foi ua faateleina masini o le a mafai ona faagaioia ai gasegase nei.

I le taimi nei, e 22 masini o lo o i le tatou fale tuai, ae 9 masini o lo o faagaioia le faamamaina o toto i Tuasivi. O le vaavaai i le vaitau lenei, e 165 gasegase ua faamama le toto. E 4 gasegase i le taimi e tasi i le aso e autovaa e amata mai lava i le Aso Gafua i le Aso Toonai, seiavagana le Aso Sa e misi.

Lau Afioga i le Fofoga Fetalai, o le taua ia o le auaunaga. E faafetai foi i le alii Pule ma le Komiti Faafae, aemaise le auaunaga a alii ma tamaitai tausisoifua ma latou o inisinia. Sa tatalo foi le sui usufono ina ia tofua falemai i nuu i tua ma masini. Na ona ou faamanatu o lo o i ai faatalanoaga i le taimi lenei a le Matagaluega, aua e le faigofie. A ave le masini, e ave ma le tausisoifua ua uma ona aoaoina lelei, potu faapitoa, ave ma le inisinia e vaai, e fai ma mea o tanevai faapitoa ina ia mafai ona faaogaina.

Lau Afioga i le Fofoga Fetalai ma le mamalu o sui usufono mamalu, e taua tele le lagalaga aemaise foi le faafesili, a o le tulaga la o i ai fuafuaga a le tatou faamamatoto. I le taimi nei, o lo o vaavaai ua uma ona sailia ma filifili le Kapeneta i le Sub Committee o galulue faatasi ma le Komiti Faafoe ma le vaega lea o le itutino lea o le falemai faamamatoto o lo o faafofoga mai le Alii Pule, ina ia mafai ona ausia le tele o manaoga o lo o i ai. O lea ua outou silasila i le paketi i le seleni ua tuuina i ai, e le o se tupe itiiti, amata mai lava i le 2005 seia oo mai i le taimi lenei. A outou silasila i le graph o fuaina ai le alu a le tagata ua maua i le mai suka lenei po o mai o lo o faamamaina toto, e leai se tausaga ua alu ai i lalo, e fagafaga lava i luga le graph lea. Ona i ai lea o le manatu ma e sa fesiligia talu ai nei le Pulega ma le Komiti Faafoe, a o le agaga o lo o matou taumafai i se auala ina ia mafai... E 499 i le 500 tagata ua uma ona sailia ma fai suesuega ua tataua ona omai e faalatalata i le masini, ae oo mai i le taimi lenei, e fefefe e omai. O le uiga la o le faamatalaga i polokalame o lo o agai i tua a le Matagaluega e tau o le PEN faa-Samoa, e sailiili ai latou ma fautuaina ina ia vave ona oo mai mo togafitiga nei, ae o tatou e maua i le mea foi lea seiloga lava e stroke faatoa oo mai ma oo ina maua i le tigaina. A o le fautuaga ma le faamatalaga, e taua tele le mea lea e saunoa ai le sui usufono mamalu, o le ala faamanino lea i nisi vala, e le faigofie le avatu o le masini i tua. Ae i ai le talitonuga o lo o faatalanoa e le Matagaluega aemaise tulaga uma e faafaigofie ai ma taugofie, aemaise foi le faagasologa o fuafuaga uma e pei ona taatia mai. So, i lau Afioga i le sui usufono mamalu, o Oketopa o le a me i ai le Kidney Foundation i le latou nofoaga fou, o i i le nofoaga foi lea sa fesoasoani malosi le Matagaluega e isolate ai nisi o tatou tagata i le Koviti-19. A o lea la ua faafaigofie ma ua uma ona fausia lelei, o Setema e taunuu mai ai inisinia faapitoa mai Siamani, ua leva ona fetuunai taimi e omai ai inisinia nei ina ia faamautu le tatou nofoaga lea. o lea la ua manino i polokalame aemaise foi le tulaga e pei ona i ai le faataotoga, e taunuu mai ia Setema, ae tatala aloaia le nofoaga fou lea ia Oketopa. Ia, o le fautuaga i le tatou Maota, ou te iloa o le tele lava o le mafuaaga o nei faamai, o mea o faamai le pipisi, po o le tele o tatou ua oo i tulaga o le faamamaina o toto, ona o le tulaga lea.

O le ala lea o le faamalosi lava o nisi polokalame a le Minisita o Tina ma Tamaitai e pei ona avatu le tai \$10,000 foi nei i tatou itumalo ina ia mafai ona fai polokalame, e taua tele mo le autalavou. Aua o le aumatutua, ua anagata, a o le autalavou laiti ma amata mai aoga ma... e tasi lena mea. Ma ia amata ona introduce taumafa tataua i tatou alo ma fanau ina ia faaitiitia. E matautia lava le alu a mea o fatugao nei se i tulou i le tulaga e pei ona tulai mai i le tatou vaitau lenei ma le faagasologa o le soifua maloloina ma tulaga e pei ona tulai mai.

Ou te iloa o le isi mataupu sa laga e Sagaga 4 o mea foi ia faapea ua sioki mea foi ia e tui ai tatou toto, mea o tubes po o fagu foi nei e... o lea e molimau atu o lea ua logo mai e le Matagaluega, o le taimi lena sa tuu le

faamuamua i gasegase tigaina, ae sa i ai lava tulaga o tatou, o lea ua taunuu mai le sapalai tele, e le o toe i ai se faaletonu.

Lau Afioga i le Fofoga Fetalai, ona ou manatu lea, ona pau ia o mea sa laga e sui usufono mamalu, aemaise tulaga e pei ona tulai mai i lenei foi Matagaluega...

**FOFOGA FETALAI:** Ia, malie lau Afioga i le Minisita, se i tuu atu i le sui usufono mamalu mo Satupatea.

**Afioga Hon Lautafi Fio Selafi Purcell:** Faafetai i le saunoaga manino a le Afioga i le Minisita, faafetai foi o lea ua ou faalogologo atu o le a taatia atu le talosaga a si matou falemai i se latou van e feoai ai, faafetai tele.

Leaga sa ou laga le isi mataupu lea ai ua misi i lau Afioga i le polokalame foi lea o le fausiaina mo fomai, ona o lenei foi polokalame ua leva tele ona tautau. Ia o lo o faatalitali mai foi le matou falemai po o afea ea e faatino ai. Na o se faafesili lau Afioga.

**FOFOGA FETALAI:** Saunoa lau Afioga i le Minisita.

**Afioga Hon VALASI LUAPITOFANUA TOOGAMAGA TAFITO SELESELE:** Lau Afioga i le Fofoga Fetalai, ae le mafai ona aveesea, o lo o ua manino, o lo o gaoioi lava le tender ina o le tatou polokalame lenei. E moni a au lau Afioga i le sui usufono, o lo o lavea foi Satupaitea i totonu o le faagaoioiga lea, a o lea ua agai lava, masalo e le i uma le tausaga lenei ua tele ina mautu a tatou falemai, aemaise o tulaga o le faaleleia. O le ala lea o le vaevae eseese o tupe sa tuu i lalo e pei o le \$3 miliona tuufaatasi, ia ua manino lava vaegatupe nei e faatatau mo fuafuaga e pei ona i ai. Ae faafetai i le sui usufono mo le faamanatu mai.

Lau Afioga i le Fofoga Fetalai, ou te iloa o lea ua ou vaavaai atu ua tau leai se lisi o manaoga. E pei ona ou fai atu o le tele o sui usufono o le tatou Maota e le i afea le Matagaluega, o i e tau mai ai le fiafia o latou i le auaunaga a le Matagaluega. Faafetai mo tulaga e pei ona i ai. Pau o le mea, ae le i faaiua sau tala, ou te faailoa atu nisi o galuega taua sa lagalaga foi e le tatou Maota aemaise foi sa tele ina fesiligia le okesene. Masalo ua lausilafia ua uma ona tatala aloaia le tatou lala e fau ai okesene pe utu ai tatou okesene, o le meaalofa mai Niu Sila faatasi ma tatou, e mafai ona utuina le 200 tane okesene i le taimi e tasi po o le aso. O le taimi muamua sa taumafai tatou te aumaia okesene mai Tutuila e hire ai le vaa faapitoa a tatou mo le aumaiga, i le taimi lenei na o le faailoa atu le tulaga pei ona i ai.

E le gata i lea o le tatou CT Scanner. Avea ia lenei avanoa ou te momoli ai le faafetai i le Afioga i le Minisita o le ACC po o Pisinisi ma Alamanuia, aua o latou nei aemaise le Matagaluega o faafofoga mai, ia e le tuua i lalo leaga o outou lea sa faatupeina le tatou CT Scanner. I le taimi nei, ua

faaaogaina ma ua i ai gasegase ua mafai ona faatinoina i ai lea auaunaga, aemaise foi ua amata ona faaitiitia ai tatou gasegase foi ia sa tuu e ave i Niu Sila mo le masini lea, a o lea ua molimau atu i lenei afiafi i le faafofoga a le tatou Maota, ua uma ona faapipiina ma ua faaaogaina.

O le masina fou pe a, o lea e faatali ai le inisia faapitoa e taunuu mai mai Filipaina mo aoga a o tatou tagata mo lea lava masini, aua sa oo mai le isi inisia muamua, ia na o le faapipiina ma le taumafai e polokalame le tatou masini, o lea la ua molimau atu, ua manino ma lelei tulaga e pei ona i ai a tatou fuafuaga. O lea e momoli ai le agaga faafetai.

Lau Afioga i le Fofoga Fetalai, ae ou te le i nofo i lalo ma faauma lou afiafi, e le mafai ona faagaloina le tapuaiga a si ou itumalo, si ou itumalo e ui ina mamao i Salafai, ae o le tou filifiliga sa outou faia, ua ou talitonu e ese le moni o le tou filifiliga, filifili o se tagata faatauvaa e i ai Valasi e sau i le Maota o Samoa ina ia lagona le tofa ma le faautaga a le itumalo. Faafetai tele, o la outou pule lea. Ae ou te talitonu o lo o manuia le tou tapuaiga o lo o outou nofo tatalo. Le afaigaluega paia a le Atua e amata mai i le Toeaina, aemaise foi le faifeau, le faafeagaiga tau i le lagi a le tatou itumalo, Epikopo ma susuga i faifeau a le Assembly, o le Worship Centre, Tausi Matagaluega, Katoliko i le Afioga ia Patele ma le Tiakono, malo faafetai tatalo, malo mo talosaga. E malosi le tino o le tou sui usufono ona o a outou tatalo, e malosi le leo, ona o la outou tatalo. E malosi foi le mafaufau ona o la outou tatalo.

Le tapuaiga a si ou itumalo, le Aiga o Mavaega, le Falefa o Sataua ma Lealuga, ae tainane le afio o Luapitofanua ma Ufagalilo, Toleafoa le Maopu, aemaise foi Tagaloa o le alii o le nuu. Le lua toalua o Utuutu ma Faitau, Aumua ma Maninoa ma le tatou nuu o Fagasa. Aua le popole mai, o manuia. Afai e tou te le faafofoga i le leo o la outou sui usufono, ia masalo tou te saili mai o lea lava e punouai ma galue. O le tatou seleni o lea ua ou taulimaina ua i totonu o le tatou tusitupe le tatou \$200,000. Aua tou te popole, po o fea lava le taimi, o isi itumalo ua uma ona faaaoga i ni mea le aoga se i tulou, a o le tatou itumalo, o lo o taofiofimamau le tou tofi, e i ai le taimi tatou te feiloai ai. Ia o lea o le a pasia foi le Tala o le Tupe, ia ua toe alu atu ma le isi vaega. E ese le manaia o le mea o le tagata e onosai.

O le ala lea lou itumalo e pele i le agaga, ia o lea ua outou faafofoga mai, e le o ni tala e aveane ai le malosi o le lauga a lo outou sui usufono ona o le tou tapuaiga, la outou pule lea, o a outou faamanuiaga e silafia e le Atua.

O lau tatalo, ia alofa le Atua ia faatumu le utu mai le lagi aua le afaigaluega o lo o faamutiaagiagi i le tatou nuu ma le itumalo aua Samoa. Maua le tofa i Aiga, aemaise foi le faautaga i Faleupolu.

O le isi mea ua galo ia te au, ou te faamaise atu, ua ou maua na lagia le tatou nuu, Faanuualii ma Faupapa i le valaau a le Atua i nai tama. Ou te faamaise atu i aiga, toalua, alo ma fanau, aemaise lava o le tatou nuu. Ia pau o le finagalo o le Atua. E leai se tasi e taumasina ma le finagalo o le tatou

Matai oi le lagi, e pule lava le Atua, ua uma ona ia faatatoto le alafua mo oe ma au, aemaise ua silafia e le Atua ia mea uma.

Lau Afioga i Fofoga Fetalai, ona ou toe oo ane lava lea i si au Matagaluega. Le tatou Matagaluega o le tatou lauga lena. O manatu ma finagalo o le tatou Matagaluega, lea ua fola i luma, aemaise le tapuaiga a si ou tama matua ia Tea Peato. O lana tapuaiga, avea ma Sui Minisita Lagolago aemaise le taumulimuli i so o se mea e i ai le Matagaluega pe a oo atu i Salafai. Le fono faufautua a Savaii ma Upolu, o outou lava e tua i ai le Matagaluega. E pei ona ou fai atu i tatou fono ua mavae, e taua lou silasila totoa i mea e aoga mo le Matagaluega, ae aua ne i aumaia ni lipoti le aoga.

Ia, le Maota, faafetai tele i lena Itu o le Maota, le Afioga i le Sui Taitai, sui usufono mamalu o Agaia lo tatou Malo, malo faafetai. Ua faafetai mo la outou tuualalo, ua lagona i le tino, lagona i le mafaufau, lagona i le loto ma le fatu le tuualalo. O a foi ni tatou finauga ona o le tulaga i le taumafai i mea lelei, e leai lava se mea e finau ai lena Itu, aemaise foi o le matou tulai atu, o le mea lava e tasi e tatou te iu lava i se lelei o Samoa, ua malo le tofa, malo le faautaga faafetai le usufono, aemaise foi o tulaga e pei ona i ai.

Ae ou te le i nofo i lalo, e momoli atu ou alofaaga i le Afioga i le Taitai o le Itu Agai, afioga Tuilaepa, aemaise foi o le Failautusi ia Lealaillepule, malo le...i lau vaavaai atu ua oulua lelei lava i le faiga o le suavai, aua e te lua popole, taoto mai, ana lua le toe avea lava le mataupu i le Faamasinoga, meamanu e te i ua lua vave toe ae mai.

Lau Afioga i le Fofoga Fetalai, ia manuia Samoa, manuia le tapuaiga a le Maota. Ia manuia si ou itumalo aemaise o le Matagaluega. Soifua ma ia manuia.

**FOFOGA FETALAI:** Ua malo faafetai saunoa i lau Afioga i e Minisita o le Soifua Maloloina, ou te iloa foi o lea ua faafofoga ma le totoa le paia o le Maota, aemaise foi o le faafogafoga mai a le atunuu, i lo outou tautua, aemaise lava o la outou Matagaluega, ona e taua tele la outou Matagaluega, o le soifua maloloina o le atunuu.

O le mea lea, faamalo faafetai, o lea foi ua e talia foi nisi o fautuaga a le Maota, aemaise lava o le faaleleia atili o le Matagaluega, ia malo faafetai foi le tali faaaloalo, aemaise foi o le faamalamalamaina o nisi foi o mataupu sa laga e le Maota. O lea foi ua i ai le fuafuaga a le Matagaluega mo le agai i luma. O le mea lea faafetai i lau Afioga aemaise foi o le Matagaluega mo le galuega fita, aemaise lava o lenei vaitaimi i le tatou faafeagai ma le faamai. Ia malo galulue faafetai le onosai faafetai tautua atunuu, ia malo lava. E silasila lava le Atua i galuega lelei, e le foi fua lava lo outou faamaoni i le tautuaina o le atunuu. O le mea lea, malo faafetai.

Ia, ua oo mai le tatou faasologa i le Minisita o Pisinisi, Alamanuia, Vaalele ma Leipa. Ia, o le avanoa lea o lau afioga leaga e fai ma e malaga, ua tau galo atu oe. Lau Afioga o lou avanoa lena ma le faaaloalo.



**Tofa Hon LEATINUU WAYNE SOOIALO (Minisita mo Leipa ma Fefaatauaiga):** Ua ou tulai atu i le ava ma le faaaloalo i lau Afioga i le Fofoga Fetalai i lenei vaega o le aso, ou te iloa foi ua leva ona tatou faaaaogagase i lenei vaiaso aemaise foi o lenei aso. Aua foi tulaga o le Fonotaga a le Palemene o lo o tatou faatasi ai.

E faafeiloai atu ai i lau Afioga i le Fofoga Fetalai, aemaise foi o lenei Itu, i le afio atu o le Afioga i le Sui Palemia, le mamalu i le Kapeneta. E faapena foi i lenei Itu, afifio Afioga i sui usufono, afio foi le Afioga i le Sui Taitai o le Vaega Faaupufai a le HRPP ae le gata i lea ae faapea foi le tapuaiga a Samoa o lo o mafai ona faalogologo mai i lenei aso.

Ou te talitonu ua uma ona paelago lenei aso i fetalaiga ma saunoaga foi i Afioga i Miniita ua maea atu. Ia o le a le toe oo i ai se faamatalaga lau Afioga, ona o le utiuti o le taimi. O lea o le a taumafai atu ai loa lenei Matagaluega po o lenei foi Sector aua foi le Fonotaga a le tatou Palemene.

Lau Afioga i le Fofoga Fetalai, ou te le i i ai i le tele o taimi na faatino ai lauga a Afioga i sui usufono ae sa ou faalogologo mai lava i ai, o lea foi sa faamaumau uma i lalo. Sa taumafai mai ina ia mafai ona maua ni tali lelei, aua foi faafesili, aua foi tuualalo, aua foi fautuaga, aemaise foi o faitioga ma tulaga uma lava ina ia mafai ona maua ai se malamalamaaga o mataupu a lenei Matagaluega.

Mo le silafia e lo tatou Maota aemaise le mamalu o si o tatou atunuu, o lenei vaega o le tatou Faigamalo o lo o i ai nei, o lo o i ai Matagaluega e 9 i lalo o le vaavaaiga a le Minisita ua tofia foi ina ia vaaia ia Matagaluega nei. O lo o i ai le Samoa Airways po o le Polynesian Airlines i le taimi sa i ai. O lo o i ai le Matagaluega o Fanua ma Eleele o Samoa po o le SLC. O lo o i ai le Matagaluega o Tau'i mo Faalavelave Faafuasei po o le ACC, o lo o i ai foi le Faalapotopotoga o Fale a Samoa po o le Samoa Housing Corporation. O lo o i ai foi le Matagaluega o Casino, po o Taaloga tupe eseese po o le Gambling Control Authority, aemaise o le Matagaluega o Pisinisi, Alamanuia ma Leipa po o le MCIL. E faapena foi i Faalapotopotoga a le Malo, po o le MPE. E le gata i lea o Pulega o Faletaalo ma Malae taalo po o le SSFA. O lo o i ai foi le Ofisa o Atinae o Pisinisi Laiti. Lau Afioga i le Fofoga Fetalai, e ui ina 9 Matagaluega i lalo o le vaavaaiga a le Minisita i lenei vaitaimi, ae na o le tolu lava Matagaluega sa afea i le tele o ni fesili, aemaise foi o ni tuualalo, aemaise foi o ni faitioga i le tulaga o le tatou Tala o le Tupe i lenei afiafi. Sa afea le Samoa Airways, sa afea le SLC, sa afea foi ma le MCIL.

Lau Afioga i le Fofoga Fetalai, o le a muamua atu se faamatalaga i le tulaga o eleele a le Malo po o le Samoa Land Corporation. Sa i ai i latou sa aumai foi ni tuualalo aemaise foi o ni talosaga ma ni faafesili. O lea sa muamua i ai le sui usufono o Salega 1, i le fanua lisi mo le Assembly of God, sa laga e

le sui usufono mo Salega 1 i Salelologa e faapea ua toe o atu le SLC ma toe aumai le fanua, ona ua le iloa po o le a le mea ua tupu.

A o le faamalamalama e le Matagaluega mo le silafia e le Afioga i le sui usufono o Salega 1 po o le Minisita Lagolago, o lenei fanua sa tuuina atu ma lisi atu e le SLC i le AOG i Salelologa e fai ai le latou Ekalesia po o le Assembly i le tausaga 2018. O le fanua e tusa pe fitu ma le afa eka lona tele. Ua fa nei tausaga o nonofo le Faalapotopotoga o Eleele o Samoa ma mataitu le faaaogaina, ae peitai, e leai se mea o faaaogaina i ai, o lea sa toe valaau loa i ai le Matagaluega o Eleele ina ia omai se i fai ni aiaiga, pe faaaoga pe le fanua pe leai. O lea la sa toe vavaese mai ai le fa eka, ona tuu lea i ai o le isi tolu eka, e galulue ai le Ekalesia. Ae peitai, i le aso 15 o Novema 20 i le 21, ua toe oo mai ai le Ekalesia i le Matagaluega o Eleele po o le SLC, e toe faafoi mai le fanua, ua le manaomia.

O lea la e fia faailoa atu ai i le sui usufono, e leai o le finagalo lava o le Ekalesia ua ala ai ona toe aumai le fanua, o lea la ua toe taatia mai iinei i le Pulega o Eleele mo le toe sauni atu, pe a faapea o i ai nisi o lo o manaomia. Ae a faapea foi e manao le Ekalesia e toe avatu loa ma faaoga, e leai lava se mea o i ai i le tulaga lea, o lo o tuuavanao atu pea, ona o le tulaga ua le faaaogaina.

O le talosaga a le sui usufono o Aana Alofi 1, na talosagaina pe mafai se 50 eka e lisiina e le itumalo aua foi le faaleleia, aemaise foi o le Ofisa o le itumalo mo ana poloketi. O le tulaga lea... o le talosaga a le sui usufono mo se 50 eka ina ia lisiina e le itumalo.

Lau Afioga i le Fofoga Fetalai, o fanua o le Malo i tuamaota o Faleasiu, e 255 eka lona tele. E le i sainia se lisi ma le afioaga o Faleasiu, ma e leai foi ni tagata taitoatasi sa ofoina i ai, pe sainia foi ni a latou lisi. O lo o galulue ai lava matai ma nisi o aiga o le afioaga o Faleasiu, aemaise pitonuu o lo o i tuamaota i totonu o le vaega eleele lea.

O lea e tatalo atu ai i le afioaga ia faaoo mai se tusi talosaga, pe a faapea o manaomia se vaeveaina o nei eka. O le faafitauli o lo o feagai ma le SLC, o le faalavelaveina lea e i latou o lo o alaala i alaalfaga nei, pe a o atu le aufaigaluega o le a fuafua pe fua fanua ia lau Afioga i le Fofoga Fetalai ina ia faatino ai tulaga ia. O lo o feteenai foi le afioaga, ona e mau isi, e tatau pea ona galulue, e na o pitonuu o lo o i tuamaota tonu o le vaega lea lau Afioga i le Fofoga Fetalai.

I le tulaga o le talosaga a Aana Alofi 3, e leai ni fanua i tuamaota o Nofolii e faatino ai poloketi o le itumalo. Lau Afioga i le Fofoga Fetalai, o fanua o le Malo i Kasala, ua vaeveaina ma lisi atu i alii ma faipule o Fasitoo. O nisi o fanua lisi o le Malo i lea itu, e i le Land Board po o le puleaina lea e le Natural Resources Environment. O se vaega tele foi o le fanua i Kasala e tuamaota ma Nofolii. O lea fanua o lo o lisiina e le Afioga ia Sala Fata Pinati. O eleele i Tanumalala e pei ona taua, e leai ma se vaega o avanoa, o lo o lisiina e le mamalu o le atunuu mo atinae.

O le talosaga a Faleata 1, talosagaina le eleele i Laloanea, e sefulu pe luasefulu eka mo le faatinoina o poloketi a le itumalo. O le taua ia o le tulaga lea, ona e tasi lenei alaalfaga po o le itumalo, e leai tele ni eleele o lo o mafai ona galulue ai i latou. O lea ua taatia mai i le Afioga i le Ofisa Sili o Pulega ma le aufaigaluega a le SLC, se i tagai ifo lava i le tulaga lea, pe maua se fanua faapea ina ia mafai ona galulue ai Faleata 1.

O lou uso mai Vaimauga 1, na talosagaina le toe faamatuu mai o eleele a le itumalo sa i le WESTEC. Ou te talitonu o le 5 tausaga lea sa ma galulue ai ma le Afioga i le sui usufono, 2016-2021, e uma lelei o talosaga le Afioga i le sui usufono i le tulaga lea ina ia faamatuu atu eleele nei, aemaise sa manao foi e avatu ae faatau atu i se tai \$8,000 pe \$6,000 ea. Sa ou nofo i lena vaitaimi ma ou tilotilo i lou uso a sui usufono, e oso le alofa i ai. Po o le a le mea ua ala ai ona tuai ona faatino e le Matagaluega le talosaga lea.

O lea la ua ou sau ou saofai atu i i, ia o lea lava ou te alofa i ai lau Afioga i le Fofoga Fetalai ae peitai, o fuafuaga a le faigamalo, ua uma ona faataatia ina ia vaevaeina nei fanua e avatu i Komiti a nuu o lo o faatinoina lea faamoemoe. O lo o i ai le Komiti a Fagalii, o lo o i ai le Komiti Fanua a Letogo, o lo o i ai foi le Komiti Fanua a nuu uma nei, a o le faalavelave, ma Vailele, a sui le Komiti, e sui foi latou faiga. E uma loa ona sui le Komiti o Eleele, omai le Komiti o Eleele i i e ese foi le latou finau ese foi latou faiga. Ua uma ona tufa e le isi Komiti, toe omai le isi Komiti toe tufa fanua lava ia e tasi. Ia toe omai le isi Komiti, toe tufa lava fanua lava ia e tasi. Ua matua le iloa e le SLC, faavasega, po o le a le tulaga e tatau ona faatino ai nei fuafuaga ma tulaga faapea.

Lau Afioga i le sui usufono, e tatau ona uma le Nofoaiga lenei, ua i ai se ta solution o le mataupu lea lau Afioga ina ia mafai ai ona faamalieina Vailele, faamalieina Letogo, faamalieina Fagalii ona o lo o i ai foi latou o lo o aumai lava le pule faa-Sao i totonu o fanua nei, a ua uma ona faatino i ai le pule a le SLC ma vaevae.

O lea foi ua toe avatu isi fanua i tua atu, o lo o taumafai e vaevaeina, ina ia taumafai lava e faamalieina le itumalo. Ia amuia outou o lo o i ai tuafanua e tou te afifio i ai a o matou i Faleata, ia o lo o taumafai lava lau Afioga i le sui usufono. O lea taatia mai ma e afio mai aua e tatau ona o ta talatalanoa pea ina ia mafai ona maua se iuga lelei e iu i ai lenei faafitauli.

Ou te talitonu, e tatau loa ona i ai se Komiti o Fanua a nuu nei ona faamau lea o nei aiaiga, ina ia aua ne i toe mafai ona toe omai le isi vaega toe sui le mea ua uma ona faatino e isi Komiti o Fanua. Ia e na o se tuualalo i lau Afioga i le sui usufono. A o au, o le matua tele lava o le alofa atu i lau Afioga, ona o lea ua toe alu atu foi le isi Nofoaiga, o lenei lava e te finau mai i eleele nei.

Lau Afioga i le Fofoga Fetalai, ona ou oo mai lea i le Matagaluega a Pisinisi, Alamanuia ma Leipa. O le a ou amata atu i le tau o oloa lau Afioga. Ia o lea foi sa finau mai ai le sui usufono o Vaimauga 1 aemaise foi o Sagaga

2. O le tulaga lau Afioga i le Fofoga Fetalai o mataupu na laga mai e sui usufono, e uiga i le tau o oloa ma Price Control.

E le po se silafia i le tulaga o le fesuisui ai o tau o oloa auina mai i fafo ma le aafiaga o le tau o oloa e faatau ai i Samoa nei. O taimi uma foi e sui ai le tau o oloa mai fafo po o le Landing Cost, e i ai foi lona aafiaga i le tau faatau atu o oloa. Ma e le o i ai se malosiaga e taofia ai fesuiaiga i le tau o oloa pe a taunuu mai iinei po o imports lau afioga. Ia ua o tatou faalogo soo i lenei tulaga ae ao ona ou faapupula foi ia tou afioga, i le tulaga o mea o lo o i ai nei Samoa ma mea o lo o aumai ai nei ia tatou oloa. E pei ona silafia, a sau le vaa mai i Niu Sila po o Ausetalia, e le toe i ai se vaa e sau mai i Ausetalia. O lea ua alu ifo tuu latou oloa i isi Malo o le Pasefika, ona o atu lea o isi vaa aumai.

Mo le silafia i le vaa lea e sau mai i Niu Sila, a faapea e sau e 100 container ae oo i le taimi e toe foi ai le vaa, pe na o se 5 i le 6 container e mafai ona toe ave. A o le isi la 90% o...

*Na motusia faafuasei felafolafoaiga a le Maota ona o se faaletonu i masini tau pueleo i le itula e 7:12 ma faataatiaese ai Taulumaga mo lana malologa o le afiafi.*

***Na toe amatalia Taulumaga a le Fono Aoao Faitulafono i le itula e 7:55 i le po ma tolopo ai loa i le itula e 8:00 i le po seia aulia le Aso Lulu, 29 Iuni 2022 i le itula e 9:30 i le taeao.***